

Silberbrenners Eydt.

Ich N. Schwere / der Römischen / auch zu Hungern vnd Behem zc. K. u. May. meinem Allergnedigisten Herrn / Vnnd an stat Ihrer May. derselbigen Hauptman oder Verwalter / so ieder zeit von Ihrer May. inn Sant Joachimstal verordnet werden / getrew vnnnd gewertig zusein / Ihrer May. Gemeynen Bergtwercks nutz fürdern / schaden warnen vnd abwenden / meinem Silberbrenner Ampt / trewlich vnd vleissig fürstehen / vnd alle Silber so mir zubrennen zugestellt werden / auff das beste vñ reynste auff's fein / an ein Quinten xvi. Lot / vngefehrlich / eynem ieden / zu seiner gerechtigkeit zum besten brennen / Damit allenthalben getrewlich handeln vnnnd umbgehn / auch sonst alles anders thuen / das einem frummen getrewen Silberbrenner zustehet / auch selber Keynes nutz / dann mir zugelassen ist / gewarten / Nochgedachter K. u. May. Ordnung vchstiglich halten / Vnd wo ich die vbergangen befinde / warnen vnd ansagen / mich wider dises alles Kainerley nutz / gab / gunst / freundschaft oder feindschaft / bewegen lassen / sonder solches allenthalben nach meinem höchsten vermügen halten / Trewlich vnd vngefehrlich / Als mir Gott helff zc.

Schichtmeister vnd Steyger Eydt.

Ich N. Schwere / der Römischen / auch zu Hungern vñ Behem zc. K. u. Ma. meinem Allergnedigisten Herrn Vnnd an stat Ihrer Mai. derselben Hauptman / oder Verwalter / so iber zeit von Ihrer May. inn Sant Joachimsthal verordnet werden / getrew vnnnd gewertig sein / Irer K. u. May. vñ Gemeines Bergtwercks bestes trewlich fürdern / schaden warnen vnd abwenden / vnnnd meinem Ampt so mir beuolhen ist / vnd sonderlich meinen Berwercken getrewlich fürstehen / alles / damit ich ihren nutz / mit recht steygern vnd erzeugen mag / auff's höchste vleissigen / Kainerley thuen / oder vorhengen / das meinen Berwercken zuschaden / oder nachteil raten mag / mich allenthalben Nochgedachter K. u. May. Ordnung vnuerbrüchlich halten / Wo ich die vbergangen befinde warnen vnd ansagen / Keines genießs / oder nutz / dann der mir in Ihrer K. u. May. Ordnung zugelassen ist / inn dem allen gewarten / mich wider dises alles Keynen nutz / gab / gunst / freundschaft oder feindschaft bewegen lassen / Sonder wil solches alles nach meinem höchsten vermügen halten / Alles getrewlich vnd vngefehrlich / Als mir Gott helff zc.

S ij Dattens